

NFCorp nafi beli hartanah di Bangsar

KUALA LUMPUR 8 Mac - National Feedlot Corporation Sdn. Bhd., (NFCorp) hari ini menafikan dakwaan Parti Keadilan Rakyat (PKR) berhubung pembelian lapan unit hartanah komersial di Bangsar oleh ahli lembaga pengarahnya.

NFCorp dalam satu kenyataannya berkata, tuduhan itu tidak benar termasuk dakwaan yang mengaitkan pembelian tersebut menggunakan pinjaman mudah yang diberikan kerajaan.

“Kita menafikan dakwaan yang mengatakan ahli Lembaga Pengarah NFCorp telah menggunakan pinjaman mudah kerajaan untuk membeli lapan unit hartanah komersial di Bangsar.

“Unit hartanah itu tidak dibeli oleh NFCorp,” kata kenyataan tersebut di sini hari ini.

Semalam, Pengarah Strategi PKR, Rafizi Ramli mendakwa Ahli Lembaga Pengarah NFCorp menggunakan pinjaman mudah oleh kerajaan bagi pembelian lapan unit hartanah komersial di Bangsar.

Dakwa Rafizi, Pengerusi Eksekutif NFCorp, Datuk Seri Mohamad Salleh Ismail telah menggunakan kawalan ke atas dana berkenaan untuk mendapatkan pinjaman bagi tujuan pembelian itu.